

Zauberer Serafin



Theater in 1 Akt

Autor: Jörg Bernhard

Bild: Die Wohnung von Lixana

ROLLEN	SCHAUSPIELER
01 Zauberer Serafin	
02 Lixana, Sternenfee	
03 Reginald, Wichtel	
04 Regenwald, Wichtel	
05 Bayou, Panther	
06 Prinzessin Cholesterina	
07 König Munibert	
08 Tillmann, Diener	
09 Derrick, Diener	
10 Cassandra von Bürstenfeld	
11 Nitzki, königliches Orchester	
12 Floralina, Blumenmädchen	
13 Aya-Lisa, Mädchen (hat das Lachen verlernt)	
14 Leefke, Ankleiderin der Prinzessin	
15 Hermina, Köchin der Prinzessin	
16 Gwendolyn, weisses Gespenst	
17 Gwennyfer, schwarzes Gespenst	
18 Whoopi, Elefantenkind	
19 Smilla, Zirkusdirektorin	
Möglichkeiten zur Verkleinerung des Ensembles: Doppelrolle: Nitzki + Smilla	

ANGABEN LINKS / RECHTS:

- Bühnenbild: vom Zuschauer aus gesehen
- kursiv geschriebene Spielanweisungen: vom Schauspieler aus gesehen

BILD	Die Wohnung
BÜHNENBILD	Wohnzimmer von Lixana, rechts angedeutet die Höhle des Panthers, Wohnung: Tische und Stühle, ev. Bilder an der Wand, Truhen, viele Fläschchen mit verschiedenen Flüssigkeiten, Pasten, Kräuter

SZENE 1

(der Vorhang öffnet sich; Auftritt Lixana, trägt ihren Hut in der Hand, setzt sich an den Tisch)

LIXANA

(leert Sternschnuppen auf den Tisch und beginnt zu zählen)

1, 2, 3, 4, 5,

Was ich do mache? Na, ich zelle mini Sternschnuppe, wo'n ich hütt gsamlet han. Die bruuch ich zum Zaubere. Aber die meischte leg ich uf d'Siite. Ha nämlich öppis ganz bsunders im Sinn mit dene.

(steht auf und legt die Schnuppen in eine Truhe)

Wüssed ihr, ich sammle jedi Wuche d'Sternschnuppe ii, drum finded ihr keini.

Ich bi ebe e Sternefee. Mit dene paar Schnuppe do chan ich mir au no allerlei herezaubere. En Toaschter, en Gasgrill oder was e Fee halt so bruucht.

(versorgt die restlichen Schnuppen; von rechts Auftritt Reginald und Regenwald)

REGINALD

Liebschti Fee, mir sind wieder do.

REGENWALD

Und händ alles erlediget, was du üs uftrait häsch.

LIXANA

Oh, Reginald und Rägäwald, mini zwei fliissige Wichtel.

REGINALD

Jojo, das sind mir.

LIXANA

Und was händ ihr z'verzelle?

REGENWALD

Mir händ im Königsschloss spioniert. Prinzessin Cholesterina wird wohl bald bi dir uftauche.

REGINALD

Si will e neu Nase. Und zwar sofort.

LIXANA

Ach du min Troscht. Ihri Nase isch doch gar nöd chrumm.

REGENWALD

Wemme Prinzessin isch, chamer das ebe - au ganz ohni Grund.

LIXANA

E neu Nase, sonen Unsinn!

REGINALD

Mir gönd wieder go spioniere!

(kleine Verbeugung, dann rechts ab)

LIXANA

So, und ich mues jetzt au wieder go schaffe, bevor die erschte Lüüt chämed mit ihrne Sorge und Liide. Ich han es neus Rezept gfunde gege Lachmuskel-Schwindsucht. Händ ihr so öppis au scho mol ghaa? Nöd? Ich säg eu, was es do alles drin hätt. Villicht wänd ihr das Gebräu jo au emol herstelle!

Also: Me nimmt ei Pikitiki-Schote, aber würrklich nur eini, gell! Echli Wuggywurz und Smocklin und d'Frücht vom Moopsiebaum. Es isch ganz eifach.

(rechts ab)

SZENE 2

(Auftritt Cassandra von Bürstenfeld; gleichzeitig springt Bayou mit einem Satz aus der Höhle; Cassandra erschrickt)

CASSANDRA

(schreit)

Ah! Uh! Igitt, es Raubtier!

(rennt davon)

BAYOU

Och! Immer renned alli devoo. Niemerd redet mit mir, also fascht niemerd.

(sitzt auf den Bühnenrand, zum Publikum)

Nur die, wo'n ich fresse, aber die reded jo denn au nüme lang... Aber ich bi kein Menschefresser, wüssed ihr. Ihr müend also kei Angscht ha. Ach...

REGIN+REGENW

(von links)

Hey Bayou!

BAYOU *(traurig)*
Hallo ihr zwei!

REGINALD Was isch denn au mit dir los?

BAYOU Niemerd redet mit mir - usserd ihr zwei! Und debii han ich hütt min 10. Geburtstag.

REGENWALD Oh, wie truurig!

REGINALD He, Rägäwald! Er hätt hütt Geburtstag!

REGENWALD Jojo, umso truuriger, wenn niemerd mit ihm redet.

REGINALD Rägäwald! Sin 10. Geburtstag!

REGENWALD *(muss noch einen Moment studieren, ehe er begreift)*
Oh! Geburtstag! Dä zächti! Reginald! Das isch jo... das isch jo...

BAYOU Na und? Was söll do scho bsunders sii? Min nüunte isch genau glich gsii. Langwillig.

REGINALD Aber nei, Bayou! Nei!

REGENWALD Din 10. Geburtstag isch öppis Bsunders. Du muesch unbedingt mit üs mitchoo!

REGINALD Jojo, es git nämlich e groosssi Überraschig für dich!

BAYOU Für mich?

REGENWALD Sicher, chasch üs glaube. Chumm!

BAYOU Oh...

(ziehen Bayou mit, alle drei rechts ab; Auftritt Lixana von rechts, mit einem Fläschchen)

LIXANA Das isch er! Min Trank gege Lachmuskel-Schwindsucht.
(stellt ihn nach hinten zu den anderen Tränken)
(Türklingel)

LIXANA Oh, das mues e Patientin sii, aber kei netti. Das ghör ich am schelle. Wenn öpper a dä Türe stoht, wo chli doof isch, denn schellets anderscht. So weiss ich immer scho wenn's schellet, was mich erwartet.
(geht nach rechts ab und kommt mit Cassandra von Bürstenfeld zurück; die setzt sich ohne zu fragen auf einen Stuhl)

CASSANDRA Min Name isch Cassandra von Bürstenfeld.
(Pause)

LIXANA Aha... Und?
(Pause)

CASSANDRA Mini Schwöschter! Ich erträgs eifach nöd!

LIXANA Was denn?

CASSANDRA Mini Schwöschter hätt di schönere Perle, di schönere Hüet, und... und... au di schönere Füess! Ich will au söttigi Perle und Hüet! Und Füess!

LIXANA Aha?

CASSANDRA Du bisch doch e Fee und häsch so Sternschnuppe-Dinger. Und mit dene chönntisch du mir das alles bsorge!

LIXANA Das chönnt ich wohl.

CASSANDRA Also denn, uf was wartisch? Ich ha nöd ewig Zii!

LIXANA Mini Sternschnuppe sind nur für echti Notfäll.

CASSANDRA *(springt auf und stampft auf den Boden)*
Das isch tänk en echte Notfall!!! Was glaubsch denn du?

LIXANA Ich mues sparsam mit mine Sternschnuppe umgoh. Ich lege sie uf d'Siite für en ganz bsundere Fall.

CASSANDRA Das isch en ganz bsundere Fall! Oder hettisch du öppe gern weniger schöni Perle, Hüet und Füess als dini Schwöschter?

LIXANA Liebi Cassandra von Bürstenfeld: Mit Sternschnuppe chan ich do wüerklich nöd wiiter helfe, aber ich luege, ob ich es Mitteli gege die Beschwerde han.

(schaut auf nach wo die Fläschchen stehen, liest da und dort, überlegt, nimmt schliesslich eines und gibt es Cassandra)

CASSANDRA

(liest)

„Suzi Herba Modicum“. Und das hilft?

LIXANA

Jede Tag am siebe ab siebni siebe Tröpfe neh. Und denn sind die Beschwerde noch wenige Täg verschwunde.

CASSANDRA

Garantiert?

LIXANA

Garantiert!

CASSANDRA

(steht auf)

Guet, denn probier' ich das us. Aber wenn's nöd hilft, denn chumm i wieder. Und denn will ich so'ne Sternschnuppe-Behandlig ha!

(geht ohne Gruss)

LIXANA

Ach, ach. Immer die Lüüt wo so gierig sind und nie gnueg überchämed. „Suzi Herba Modicum“ - das isch en Bescheideheitstrank. Hilft au gege Hirnrissigkeit.

SZENE 3

Wenn sie das Mitteli es paar Täg gnoh hätt, wird sie ihri Perle und Hüet grosszügig verschenke. Und debii bliibt sie ersch no z'friede. Guet hä?

REGINALD

(von rechts, mit Regenwald und Bayou)

Lixana! Lixana!

REGENWALD

Los zue! Er hätt hütt sin 10. Geburtstag!

BAYOU

Ich verstoh überhaupt nüüt...

LIXANA

Oh! Wenn ich eu zwei nöd hett!

REGINALD

Jojo, wenn du üs zwei nöd hettisch!

REGENWALD

Los! Du muesch es jetzt mache!

LIXANA

Langsam! Dä arm Bayou verstoht jo überhaupt nüüt meh!

BAYOU

Ehrlich gseit, nei...

LIXANA

Sitz ab und los zue, was ich dir verzelle.

(Lixana und Bayou setzen sich an den Tisch; Wichtel bleiben nervös stehen)

Ich han dini Muetter guet kennt.

BAYOU

Oh! Ich han mini Muetter nie kenne g'lernt.

LIXANA

Es isch e gföhrlichi Ziit gsii, und du bisch no ganz chlii gsii. Dini Muetter isch e Häx gsii - und du en chliine Zauberer.

BAYOU

En Zauberer? Ich?

LIXANA

Zu dere Ziit sind Häxe, Zauberer und au Fee verfolgt worde. Me hätt sie verhaftet und verschleppt. D'Lüüt händ Angscht ghaa vor Zauberei.

REGINALD

Drum hätt dich dini Muetter inen Panther verwandelt, damit sie nöd merked, dass du es Häxechind bisch.

LIXANA

Es hätt nöd vill bruucht, dass me verhaftet worde isch, und es sind au ganz gewöhnliche Fraue verschwunde.

REGENWALD

Jojo!

LIXANA

Wenn zum Bispill imene Garte dä Bluemehöl schöner gwachse isch als bi dä Nachbarin, denn isch das scho verdächtig gsii. Wenn denn no irgendwo en Bäse umeg'stande isch, jo denn...

REGINALD

...denn hätt das scho g'langet, dass me verhaftet worde isch!

BAYOU

Und wo isch denn jetzt mini Muetter?

LIXANA

Das chan ich dir leider nöd säge. Sie isch verhaftet worde und siither isch sie verschwunde.

REGENWALD

Und du heissisch au gar nöd Bayou!

REGINALD

Jo, das isch nur zur Tarnig gsii. Du heissisch Serafin!

BAYOU

Serafin?

REGENWALD

Jojo! Und d'Lixana hätt villi Johr lang Sternschnuppe g'sammet, damit sie dich a dim 10. Geburtstag chan zruigg verwandle.

LIXANA

(holt die Sternschnuppen aus der Truhe)

Genau. Und mit mine Sternschnuppe chan ich dich in Zauberer Serafin zruug verwandle.

BAYOU *(steht auf, läuft herum, sitzt auf die hintere Truhe)*
Das isch jetzt grad echli vill für mich. Aber... guet, wenn's eso isch, denn will ich gern en Zauberer sii.

LIXANA *(nimmt die Sternschnuppen)*

Bisch bereit?

BAYOU Hoffentlich funktioniert das au...

(Zauberermusik)

(Lixana wirft die Sternschnuppen vor Bayou in die Luft, Bayou wirbelt herum, verschwindet; dann taucht Serafin auf)

SERAFIN *(schaut sich verwundert um, fasst sich an die Nase, sieht sich selber an)*

Wie komisch! Ich bi tatsächlich en Mensch worde.

LIXANA Wie fühlst di?

SERAFIN *(entdeckt, dass er keinen Schwanz mehr hat)*

Hm, ich ha kein Schwanz meh. Dä vermiss ich echli. Bin em immer so gern no'grennt.

LIXANA *(holt aus der Truhe vorn das Hexen-ABC)*

Serafin, lueg. Das hätt mir dini Muetter geh, bevor sie verschwunde isch.

SERAFIN „Hexen-ABC“. Isch das es Zauberbuech?

LIXANA S'Häxe-ABC. Do chasch du alles lerne, was en Zauberer mues chöne. Dä Reginald und dä Rägäwald chönd dini Assistenten sii.

REGENWALD Ou jo! Mir sind gern dini Assistenten und helfed dir bim zaubere!

SERAFIN Denn loo üs doch grad aafange. Chömed ihr zwei!

(Serafin mit Hexenbuch, Reginald und Regenwald rechts ab)

SZENE 4

(Türklingel)

LIXANA Ouou! Scho wieder dä Ton. Do wird wieder en schwierige Fall vor dä Türe stoh!
(Lixana rechts ab; kommt mit Cholesterina, Tillmann und Derrick zurück; Cholesterina bedeutet den Dienern, wo sie stehen zu bleiben haben, sie läuft herum, fasst alles an, liest, schaut sich um)

CHOLESTERINA Tillmann und Derrick!

TILLMANN Prinzessin Cholesterina, Tochter vo üsem verehrte König Munibert.

DERRICK Wünscht e Behandlig vo dä Sternefee Lixana.

CHOLESTERINA *(setzt sich auf einen Stuhl)*

Und zwar Folgendes: Tillmann und Derrick, erkläred dere Fee was ich bruuch.

TILLMANN Sehr wohl. D'Prinzessin wünscht sich e neu Nase.

DERRICK *(deutet an)*

So eini. Nöd z'lang und nöd z'churz.

LIXANA Ich... äh... han devoo g'hört.

TILLMANN Um so besser.

DERRICK Denn weisch du jo, was z'tue isch.

LIXANA Ehrlich gseit, isch mir dä Wunsch nöd ganz klar. D'Nase vo dä Prinzessin isch doch iiwandfrei. Ganz hübsch.

TILLMANN Das isch... äh...

CHOLESTERINA *(gebietet Tillmann zu schweigen)*

Das isch nöd dä Punkt. Dä Punkt isch dä, dass ich eifach e neu Nase bruuch, will ich Luscht han uf e neu Nase. So.

LIXANA Aha.

CHOLESTERINA Jo, aha. Villicht setzisch dis Füdli jetzt emol in Bewegig und fangs ch a.
(fuchtel mit einer Hand)

Bedienig!

LIXANA Ich will eu - wenn ihr das würklich wünsched, mini Kollektion vo Nase zeige.

CHOLESTERINA *(holt Nasen auf einem Tablett aus einer Truhe hinten)*
 TILLMANN Tillmann! Derrick!
 TILLMANN *(machen einen Schritt vorwärts)*
 Jo, verehrti Prinzessin?
 DERRICK Do simmer scho!
 CHOLESTERINA Ihr zwei werded die Nase probiere!
 TILLMANN Probiere?
 DERRICK Wieso? Mir wänd doch gar kei neui Nase.
 TILLMANN Mir sind ganz z'friede mit dere wo mir händ.
 CHOLESTERINA Ich will tänk luege, wie's usgseht! Das gsehn ich jo nöd a mir selber!
 DERRICK Sicher?
 TILLMANN Aber nöd, dass sie denn doch plötzlich nüme abgoht.
 DERRICK Bi sonere Häx weiss me doch nie...
 LIXANA Fee!

*(Lixana hält Tillmann und Derrick abwechselnd eine Nase an die Nase;
 Cholesterina steht auf, begutachtet genau, den beiden Dienern ist es nicht wohl)*

 TILLMANN *(beide fassen sich an die Nase)*
 Fertig? Derrick, han ich mini Nase no?
 DERRICK Jo, die isch no do. Tillmann, han ich mini Nase au no?
 TILLMANN Jo, die isch no do, aber schöner worde isch sie au nöd.
 CHOLESTERINA Dis Nase-Sortiment isch jo erbärmlich, grässlich, völlig us dä Mode!
 TILLMANN Jo... lausig!
 DERRICK Scheusslich!
 CHOLESTERINA Steck dir dini Nase suscht woane! Tillmann! Derrick!
(Abgang rechts, Tillmann und Derrick hintendrein)
 LIXANA *(schüttelt den Kopf, zum Publikum)*
 Ach, so Lüüt, wo eigentlich nüüt bruuched und mit'ere total hirverbrennte Idee
 dähler chömed. Git's das bi eu au?
(studiert, versorgt Nasen wieder in der Truhe)
 Na, öppis mitgeh chönnt ich jo dere Prinzessin scho.
(zaubert)
 Himpe-di-di, Himpe-di-du, Nasus Longus im Nu. Ratz Fatz!
(Lixana rechts ab)
(eine Zaubermusik ertönt)
 CHOLESTERINA *(mit langer Nase von rechts, läuft mit Tillermann und Derrick vor der Bühne durch
 → z.B. Kunststoffnase mit Mastix ankleben oder einfach selbstgemachte Pappnase
 mit Gummiband)*
 Was glaubt denn die tumm Fee? Sie chöni mir sone billigi Nase verchaufe?
 TILLMANN *(hin- und hergerissen zwischen selber lachen und dem Publikum zu bedeuten nicht
 zu lachen)*
 Guet händ ihr gseit, dass ihr...
(muss lachen)
 CHOLESTERINA Was tüend ihr zwei so komisch?
(zum Publikum)
 Und ihr au! Me chönnti meine, ich gsächti us wie'n es Säuli!
(links ab)
 REGINALD *(von rechts Reginald und Regenwald mit Hirschgeweih, Serafin mit Hexenbuch)*
 Serafin! Was häsch g'macht!
 SERAFIN Das tuet mir wüirklich leid!
 REGENWALD Mach das sofort wieder weg!
 SERAFIN Das isch komplizierter als ihr denked! Es gseht übrigens sehr schigg us!